

四庫全書

史部

欽定四庫全書

史部

續資治通鑑長編卷一百十四

詳校官檢討臣劉錫五

刑部郎中臣許兆椿覆勘

纂修官編修今任御史臣鄒玉藻

膳錄監生臣俞錫玉

欽定四庫全書

續資治通鑑長編卷一百十三

宋 李燾 撰

仁宗

明道二年八月甲午朔契丹國母及國主遣天德節度使耶律信寧大理卿和道亨河西節度使耶律嵩引進使馬世卿來弔慰興聖宮使耶律守寧知制誥李奎來祭奠

丙申以太常丞劉沆直集賢院沆前同判舒州章獻太

后遣內侍張懷信修山谷寺建資聖浮屠懷信挾詔命  
督役嚴急州將至移疾不敢出沆奏罷懷信歸沆永新  
人也

沆與孫抃同時直  
集賢院今但記沆

贈工部員外郎曹修古為右

諫議大夫修古鯁直有風節當章獻時權倖用事人人  
顧望畏忌而修古遇事輒言無所回挽初貶同判杭州  
未行改知興化軍卒於官貧不能歸葬賓佐賻錢五十  
萬季女泣白其母曰奈何以是累吾先人也卒拒不納  
帝思修古忠故優贈之仍賜其家錢二十萬修古無子

錄其婿劉勲為試將作監主簿

始章獻不豫赦常所不原者而有司屢以惠姦為言戊戌詔殺人者雖會庚寅赦並刺配千里外牢城

己亥詔契丹國所獻禮幣甚厚其於常所遺物外增黃金三百兩御史中丞范諷請轉漕河陽河陰倉粟以賑京東饑民從之懷安軍判官熊文雅言母老願以三任告身授母一邑封詔特與之仍令流內銓注文雅家便試銜知縣

庚子殿中侍御史段少連言頃歲上御藥楊懷德至漣水軍稱詔市民田三十頃給僧寺按舊例僧寺不得市民田請下本軍還所市田收其直入官從之

壬寅名章獻明肅太后章懿太后新廟曰奉慈從翰林學士馮元侍讀學士宋綬等議也

癸卯詔凡除轉運使及藩鎮邇郡守臣自今並許上殿奏事

此時未復提刑詔乃有之恐後人所增今削去提刑字

免登萊二州今秋

田租

國子監說書賈昌朝言禮母之諱不出於宮今章獻明  
肅太后易月制除猶諱父名非所以尊宗廟也甲辰詔  
勿復避

丁未命度支判官刑部郎中劉賽西染院副使兼閤門  
通事舍人符惟忠度支判官司封貲外郎李昭述東染  
院副使張茂實使契丹謝國母及國主來弔慰祭奠賽  
盆子茂實景宗養子也

戊子殿中侍御史張奎言京師鬪訟尤繁請置内外左

右廂受事判官各一員乃詔近臣舉官而士人多耻為之尋復罷

壬子宰臣張士遜等言比諸道旱蝗請用漢故事冊免蒙賜詔不許今陛下既減損尊名願各降官一等以塞天異上慰勉之

丁巳置端明殿學士班翰林資政學士之下以翰林侍讀學士兼龍圖學士宋綬為之太平興國五年初改端明殿學士班樞密副使之下自程羽李昉後不復除授



承明既災更命新殿曰端明於是復置學士與文明之職並見而班孟降矣然訖無拜文明殿學士者綬固辭端明不聽請解龍圖閣許之綬因上言帝王御天下在總攬威柄而一紀以來令出簾箔自陛下躬親萬幾內外延首渴見聖政宜懲違革弊以新百姓之耳目而賞罰號令未能有過於垂簾之日豈非三事大臣不能推心悉力以輔導陛下之意邪頃太后朝多各除拜而邪幸或徑取升擢議者以謂恩出太后而已今恩賞雖行

又謂自大臣出非大臣朋黨罔上何以致此且朋黨之  
為朝廷患古今同之或窺測帝旨密令陳奏或附會已  
意以進退人大官市恩以招權小人趨利以售進此風  
寢長有蠹邦政太宗嘗曰國家無外憂必有內患外憂  
不過邊事皆可預防惟姦邪共濟若為內患可深懼也  
真宗亦云唐朝朋黨尤甚以至王室卑弱願陛下思祖  
宗訓戒念王業艱難整齊紀綱正在今日

戊午命兵部員外郎知制誥丁度右驤驥使王繼凝為

契丹國母生辰使度支副使兵部員外郎李紘禮賓副使李繼一為國主生辰使度支判官刑部郎中章頻禮賓副使李遵懿為國母正旦使開封府推官金部員外郎王仲睦供奉官閤門祗候郭崇為國主正旦使琮留不行以供備庫副使張瑋代之

三司言自藉田後繼有賞賚用度不足請假於內藏庫庚申出緡錢百萬賜之因謂宰相張士遜曰國家禁錢本無內外蓋以助經費耳士遜對曰不然則有司未免

浸漁百姓也

辛酉命翰林學士章得象知制誥鄭向編定一司一務  
敕

上方欲用太常博士劉越為右司諫而越已卒九月癸  
亥朔遂以右司諫贈越錄其子丹為試將作監主簿賜  
其家錢十萬

甲子詔閣門使班宣政使之上又詔諸司使至三班使  
臣並五年一磨勘帶閣門祇候者四年諸司使副仍以

五資為一轉

乙丑被災州縣罷給來年蠶鹽

丙寅崇信節度使同平章事判河南府錢惟演落平章事赴本鎮初惟演欲為自安計首建二后並配議既與劉美觀又為其子曖娶郭皇后妹至是又欲與章懿太后族為婚御史中丞范諷劾奏惟演不當擅議宗廟又言惟演在章獻時權寵太盛與后家連姻請行降絀上諭輔臣曰先后未葬朕不忍遽責惟演諷即袖告身入

對曰陛下不聽臣言臣今奉使山陵而惟演守河南臣  
早暮憂刺客願納此不敢復為御史中丞矣上不得已  
可之諷乃趨出丁卯復奪暖一官落集賢校理聽隨惟  
演行諸子皆補外州監當

戊辰詔節度使至閣門使緣邊州軍鈐轄諸司使各舉  
殿直以上有材勇曾歷邊任者一人

甲戌幸洪福院易衰服奠章懿太后梓宮丙子又奠焉  
丁丑詔國忌日罷佛像前設神御

已卯加贈齊王元佐為潞王陳王元份為潤王安王元  
傑為邢王密王元偓為蘓王曹王元偁為華王魏王德  
昭為吳王岐王德芳為潭王先是諸王子孫各請贈其  
父為皇太子詔翰林學士馮元端明殿學士宋綬詳定  
而元等言周王元佑陛下長兄宜追冊為皇太子太祖  
二王太宗五王追卹之典禮難均及故元佐等止徙封  
加鎮及兼官而已詔考詳元祐冊禮以聞

庚辰加贈潁川郡王德彛兼中書令申國公德恭為高

密郡王謚慈惠臨沂郡公德隆為廣平郡王謚恭肅咸寧郡公德雍為廣陵郡王

辛巳加贈安定郡王惟吉為冀王樂安郡公惟正為同安郡王

壬午章獻明肅皇太后靈駕發引上顧輔臣曰朕欲親行執紼之禮以申孝心乃引紼行哭出皇儀門禮官固請而止遣奠正陽門外遂詣洪福院服素紗幘頭淡黃衫從官常服黑帶奉引章懿太后梓宮遣奠廷中皆改



衰服奉辭隨梓宮攀號不已左右固請止上泣曰劬勞之恩終身何所報乎步送至院西南隅仗轉乃還

甲申再貶濠州防禦使馬季良為左屯衛將軍滁州安置御史中丞范諷言季良僥倖得官當行追奪故也開封府又劾奏季良冒立券庇占富民劉守謙免戶役詔許季良自陳以地給還之

乙酉翰林學士龍圖閣學士兼侍講給事中馮元落翰林學士知河陽六宅使昌州刺史內侍押班盧守勲落

押班為永興軍鈐轄前上御藥張懷德罰銅三十斤先是禮賓使李用和言發章懿太后故陵有泉水沮洳以元暨守勲嘗同護葬事故責及之懷德本擇葬地前坐張永信事已配廣南至是益徙遠處

丁亥賜新楚州都監內殿崇班薛俊銀百兩仍詔自今內殿崇班至諸司使為都監者並如例賜之

己丑詔被災州縣今年秋稅官毋得折變支移

庚寅罷儀鸞司建繡帘幕

辛卯詔梓州路仍歲旱疫令轉運使親按所部民蠲其租

冬十月甲午詔緣邊諸寨監押兩負處以官高者為寨主 禁登州民采金

乙未置應天府書院講授官一員 知諫院孫祖德言  
護國節度使兼侍中張耆建樓于私第下瞰社稷祠壇  
請毀撤之詔可

丙申詔天下山林自天聖七年以來為豪民規占其利

者悉還官與百姓共之

丁酉祔英章獻明肅皇太后章懿皇太后于永定陵  
庚子詔天下閏年造五等版簿自今先錄戶產丁推及  
所更色役榜示之不實者聽民自言

辛丑太常丞直集賢院同監左藏庫韓琦言天禧中入  
內侍省置合同憑由司凡傳宣取庫物令內臣自齎  
合同憑由送逐處已乃繳奏下三司出破帖今內臣皆  
先以白劄子傳宣而後降合同其間或稱禁中對換物

色及支外以餘物還庫恐有妄偽請自今非降合同毋得支從之 詔三司判官開封府判官羣牧判官審刑院詳議官自今告謝日並令閣門取旨賜章服 濟齊州清河

甲辰詔曰先王不以浮靡示天下今兩川歲貢綾錦羅綺透背花紗之屬皆女工蠹也其以三之二易為絢綃供軍需 時上富於春秋左右或欲以巧自媚後苑珠玉之工頗盛於前日殿中侍御史龐籍言今蠶螟為災

民憂轉死北有耶律西有拓跋陛下安得不以儉約為師奢靡為戒重惜國費以徇民之急上深納其言命翰林學士承旨盛度等詳定裁減天下歲所度僧道人數初晏殊出知亳州言僧圓定者嘗奉詔西天取大集論還賜紫衣乃與其徒為刼盜里中且比歲普度僧道皆游惰之人宜別為條約故委官裁減之

乙巳左藏庫使普州團練使入內副都知并代路鈐轄江德明落副都知領果州防禦使為潞州鈐轄西京作

坊使內侍押班朱允中落押班為六宅使天雄軍鈐轄  
初德明等在章獻時頗用事至是言者以為猶不檢畏  
故落職而外遷之 李仲容言曹州池庫畎澮舊迹具  
存而率多湮廢歲積水為患請使知州通判及屬縣令  
佐並帶開治溝洫河道事詔從之

己酉祔章獻明肅太后章懿太后主于奉慈廟

辛亥上諭輔臣曰近歲進士所試詩賦多浮華而學古  
者或不可以自進宜令有司兼以策論取之 詔內外

京朝官釐務者並三歲一遷官從三司判官鄭戩之請也司封員外郎秘閣校理吳遵路為開封府推官始章獻太后稱制下莫敢言得失遵路條奏十餘事語皆切直忤太后意出知崇州遵路至崇州即令轉市吳中米以備歲儉已而果大乏食民賴賑濟自他流至者亦十全八九范仲淹安撫淮南薦遵路為郡得古人之風乞以遵路救災事迹頒諸州為法並付史館崇州即通州遵路淑子也佐京府不三月又遷鹽鐵判官

此事附見



癸丑德音降東西京囚罪一等徒以下釋之緣山陵園陵應奉民戶免租賦科役有差

甲寅注輦國王尸囉茶印陀囉遣使蒲押陀離等以泥金表進真珠衫帽及真珠一百五兩象牙百株陀離自言數朝貢而海風破船不達願將上等珠就龍床脚撒殿頂戴瞻禮以申嚮慕之心乃奉銀盤升殿跪撒珠於御榻下而退 詔太常禮院集道官定聖祖天尊大帝北極紫微大帝醮位以上封者言陳彭年曩定醮儀升

聖祖在紫微上多至天下旱也禮院言自今請各為醮位而同祠之庶無升降之嫌且不失尊奉之意從之

丙辰追贈周悼獻王祐為皇太子祐本名元佑以犯聖祖諱乃止書曰祐有司言王舊無宮府其冊命第告於宗正寺屬籍堂而遣使焚黃於永安王所葬處從之  
贈章懿太后三代

戊午奉安章獻明肅太后神御於慈孝寺彰德殿章懿太后神御於景靈宮廣孝殿是日門下侍郎兼兵部

尚書平章事張士遜罷為左僕射判河南府樞密使山  
南東道節度使楊崇勲罷為河陽三城節度使同平章  
事判許州先是天下蝗旱仍見士遜居首相不能有所  
發明上頗復思呂夷簡及百官詣洪福院上章獻太后  
謚冊退而奉慰士遜乃過崇勲園飲酒日中不至羣臣  
離立以俟御史中丞范諷劾奏之遂與崇勲俱罷然制  
辭猶以均勞佚為言也

復思夷簡  
據記聞

武勝節度使同平

章事判陳州呂夷簡為門下侍郎兼吏部尚書平章事

資政殿學士吏部侍郎知河南府王曙加檢校太傅充  
樞密使簽書樞密院事王德用為樞密副使端明殿學  
士兼翰林侍讀學士刑部侍郎宋綬為叅知政事龍圖  
閣學士給事中權三司使事蔡齊為樞密副使

己未張士遜為山南東道節度使同平章事判許州楊  
崇勲改判陳州初士遜與崇勲俱入告謝士遜乃位崇  
勲下上問其故士遜對曰臣官僕射而崇勲為使相上  
因以使相授士遜士遜已罷政事翰林學士承旨盛度

草制當言新除左僕射而誤用士遜舊銜有司奉行制書不復追改論者非之 龍圖閣學士工部侍郎權知開封府程琳為御史中丞右諫議大夫權御史中丞范諷為龍圖閣直學士權三司使事琳辭中丞不拜乃授翰林侍讀學士兼龍圖閣直學士知開封府前知開封者苦其煩劇或不滿歲輒罷不然被謗譏或以事去獨琳居數歲久而治益精明一歲中獄常空者四五舊制學士以先後入序班時狄棐先諷為龍圖閣直學士而諷

盛氣凌裴宰相李迪右諷特詔諷班裴上論者非之

庚申詔自今每日御前殿視事其休務并假日並如舊制上即位之初尚循真宗晚年故事惟隻日御殿故也壬戌幸慈孝寺及景靈宮酌獻章獻明肅太后章懿太后神御殿自唐以來民計田輸賦外增取他物復折為賦所謂雜變之賦者也亦謂之泐納而名品煩細其類不一官司歲附帳籍並緣侵擾民以為患帝既躬耕藉田因詔三司泐納物以類併合於是三司請悉除名

名品併為一物夏秋歲入第分麤細二色百姓便之

百姓

便之此據本志實錄但云從之程琳以明年五月為三司使言并稅名是更參詳之

十一月癸亥朔封秦悼王女承慶郡主為樂平公主興平郡主為大寧公主燕國大長公主女長樂郡主高氏為仁壽公主始太宗嘗以秦王二女為皇女封雲陽貴鄉公主今封樂平大寧猶用故事而高氏又異姓特封制下議者皆以為非尋亦罷之又追封真宗第二女為衛國長公主號清虛靈照大師賜名志冲公主初入道

蚤天不及封故追命之 禮部侍郎叅知政事薛奎罷  
為資政殿學士戶部侍郎判都省始章獻崩二府大臣  
皆罷去奎獨留帝且倚以為相而奎得喘疾數辭位有  
詔免朝謁視事如故又數賜告還第久之乃罷 龍圖  
閣待制孔道輔為右諫議大夫權御史中丞代程琳也  
道輔時守南京召用之 詔宗室諸司使月增俸錢萬  
副使而下遞增有差 府州言簡州團練使折惟忠卒  
惟忠世將家知兵事天聖中契丹與夏人會兵境上聲



言嫁娶惟忠覘得其實率麾下往備之嘗戒士卒毋輕動一夕風霾有騎走營中以為寇至惟忠堅卧不動徐命擒之得數誕馬蓋敵所縱也領府州事凡二十年既卒詔錄其弟子姪孫七人長子右班殿直閤門祗候繼宣知府州久之特贈惟忠耀州觀察使從繼宣請也

贈觀

察使乃實元元年  
六月事今聯書之

甲子以山陵園陵畢燕紫宸殿

乙丑追冊美人張氏為皇后上雅意所屬故也仍命內

園使岑守素即故瑩為陵闕而不立廟贈其父供備庫使守瑛為鄧州觀察使

丙寅詔崇文院纂唐遺事翰林學士承旨盛度請命官刊修唐書故也

密州歲饑多盜已巳權增屬縣弓手各二十人

辛巳詔梓遂資普四州歲饑其免四等已下戶今秋田稅之半三等以上十之三果合渠三州四等以下戶十之二

寇準以謫死既十一年庚寅赦書始復太子太傅甲戌  
贈準中書令復萊國公其壻屯田員外郎張子臯復直  
史館仍令齎詔賜其家祭酹之又贈左驥驥使英州團  
練使周懷政為安國節度使以其弟太子右內率府副  
率宿州安置懷吉為禮賓副使

子臯宗海  
子已見

乙亥詔三司減價糶廩粟以濟貧民

丙子加贈荆王元儼母太儀王氏為德妃

丁丑改集聖殿為肅儀殿殿在禁中聖祖所臨降也初

曰真游以奉道像後改集聖於是再葺之更今名

戊寅大理評事劉渙為右正言初渙上疏章獻太后請  
還政太后怒議黥面配白州屬太后疾革宰相呂夷簡  
為稽故不即行至是渙以前疏自言夷簡請褒擢上既  
用渙顧謂夷簡曰向者樞密院亟欲投竄賴卿以免夷  
簡謝曰渙踈外敢言大臣或及此則太后必疑風旨自  
陛下使母子不相安矣上喜以夷簡為忠

楊氏編年於  
天聖九年六

月載奉禮郎劉渙上疏太后請還政不知何據據渙傳  
上疏時渙實為禮郎賴呂夷簡及薛奎解太后乃得免

然亦不載是何年月但云太后聽政已十年疑楊氏據十年語因附天聖末按夷簡傳云屬太后疾革則換上疏時必非天聖末矣所稱六月茲不可知今止從夷簡新傳

已卯徙判天雄軍王曾判河南府始陳堯咨與曾有隙曾實代堯咨於天雄政有不便者徐更之彌縫不見其迹及去堯咨復繼曾後見府署及什器皆因堯咨舊規但完葺無所改嘆曰王公宜其為宰相我度量誠不及也  
詔京東河北募民入粟

庚辰詔諸州都同巡檢如所部劫盜三火以上不獲者

並降監當

己丑以度支判官刑部郎中章頻兼侍御史知雜事頻時奉使契丹未還尋卒于紫濛館契丹遣內侍就館奠祭命接伴副使吳克荷護其喪以錦車駕橐駝載至中京欽以銀飾棺又具鼓吹羽葆吏士持甲兵衛送至白溝詔遣其子訪乘傳扈歸仍以知雜誥賜其家錄于婺州司理參軍詢為大理寺丞訪為三班奉職訪即許也

庚寅詔知開封河南應天府自今並兼畿內勸農使  
辛卯都官貲外郎判刑部李遜言刑部舊分四案大辟  
居其一月覆大辟不下二百數而詳覆官才一人諸令  
四案分覆大辟有能駁正死罪五人以上歲滿與改京  
官又請令法直官與詳覆官分詳天下旬奏及二年亦  
與改官並從之 詔判審官院三班院官親戚京朝官  
使臣差遣磨勘更不逐旋申奏便仰牒同判官一面依  
例施行訖以聞

真宗承天節日自天聖以來不御殿及罷羣臣辭見著  
為式有司言非典故也請正之十二月癸巳朔始詔閤  
門以承天節日為常朝 命參知政事宋綬看詳修纂  
國朝會要

乙未樞密使王曙言天下廂軍止給諸役而未嘗教以  
武技其中頗有材勇之人宜漸加訓習以升隸禁軍從  
之官詔樞密院宗室諸司使以下改官其所增俸錢臨  
時聽旨



丙申上謂輔臣曰每退朝凡天下之奏必親覽之呂夷簡曰若小事皆關聽覽恐非所以輔養聖神上曰朕承先帝之託況以萬幾之重敢自泰乎又曰朕日膳不欲事珍美衣服多以縑繒為之至屢經澣濯而宮人或以為笑大官進膳有蟲在食器中朕掩而不言恐罪及有司也夷簡曰陛下孝以奉先儉以臨下雖古盛德何以加此上曰此偶然與卿等言之非欲聞于外嫌其近名爾始天聖六年罷諸路提點刑獄官八年復置又權傳

於是上謂輔臣曰諸路刑獄既罷提點官轉運司不能  
一一躬往讞問恐寢致冤濫宜選賢明廉幹不生事者  
委任之則民受其賜矣乃復置諸路提點刑獄官仍參  
用武臣此據政要樞密直學士王巖嘗建此議上採用之此據

王巖  
傳

丁酉詔諸路轉運使副自今出巡須歲一徧所部止得  
以兩吏自隨仍委諸州具所至月日以聞

癸卯詔崇文院舊有火禁自今遇館閣宿直聽留

甲辰以京東饑出內藏庫絹二十萬下三司代本路上供之數

乙巳詔修河南府周六廟鄭州周太祖世宗廟并祀恭帝

丁未出侍御史張沔知信州殿中侍御史韓瀆知岳州先是宰相李迪除二人為臺官言者謂臺官必由中旨乃祖宗法也既數月呂夷簡復入因議其事於上前上曰祖宗法不可壞也宰相自用臺官則宰相過失無敢

言者矣。廸等皆惶恐，遂出汚漬，仍詔自今臺官有闕，非

中丞知雜保薦者，毋得除授汙浦城人也。

此段參取江氏雜志及張

氏政要然政要謂除二人為司諫正言則誤也

戊申，出宮人二百。上時屢出宮人，呂夷簡曰：「此聖朝美

事。然民間物貴，恐出宮或有失所者，亦宜念之。」上因曰：

「曩者太后臨朝，臣僚戚屬多進女口入宮。今已悉還其

家矣。」

此據寶訓景祐元年八月壬申詔又具載此語張士遜亦嘗納女口於宮中今附寶元二年四月

己酉，詔開封府界京東、西、河北、河東、陝西、江南、兩浙、荆

湖北路貧民流移而遺棄老幼不能自存者所在官司  
收養之勿令失所

甲寅改正陽門曰宣德天安殿曰大慶端明殿曰延和

去年十月始改承明曰端明今年八月端  
明始除學士又改名不知何故俱當考

詔開封府

及京東西淮南江東河北河東路明道二年以前流民  
去鄉里者限一年令歸業仍蠲賦役一年限滿不至者  
聽人請佃之 右司諫范仲淹請天下諸縣弓手及七  
周年者聽歸農從之

初郭皇后之立非上意浸見踈而后挾章獻勢頗驕後宮為章獻所禁遏希得進及章獻崩上稍自縱宮人尚氏楊氏驟有寵后性妬屢與忿爭尚氏嘗於上前出不遜語侵后后不勝忿起批其頰上亦起救之后誤批上頸上大怒有廢后意內侍副都知閻文應白上出爪痕示執政近臣與謀之呂夷簡以前罷相故忌后而范諷方與夷簡相結諷乘間言后立九年無子當廢夷簡贊其言上意未決外人籍籍頗有聞者右司諫范仲淹因

對極陳其不可且曰宜早息此議不可使聞于外也居  
久之乃定議廢后夷簡先敕有司無得受臺諫章疏  
乙卯詔稱皇后以無子願入道特封淨妃玉京冲妙仙  
師名清悟別居長寧宮臺諫章疏果不得入仲淹即與  
權御史中丞孔道輔率知諫院孫祖德侍御史蔣堂郭  
勸楊偕馬絳殿中侍御史段少連左正言宋郊右正言  
劉渙詣垂拱殿門伏奏願賜對以盡其言護殿門者闔  
扉不為通道輔撫銅環大呼尋有詔宰相召臺諫諭以

皇后當廢狀道輔等悉詣中書語夷簡曰人臣之於帝  
后猶子事父母也父母不和固宜諫止奈何順父出母  
乎衆譁然爭致其說夷簡不能荅拱立曰諸君更自見  
上力陳之道輔與仲淹等退將以明日留百官揖宰相  
廷爭而夷簡即奏臺諫伏閣請對非太平美事乃議遂  
道輔等始至待漏院詔道輔出知泰州仲淹知睦州祖  
德等各罰銅二十斤故事罷中丞必有告辭至是直以  
敕除又遣使押道輔及仲淹亟出城仍詔諫官御史自



今並須密具章疏毋得相率請對駭動中外絳平陰人也  
偕奏乞與道輔仲淹俱貶勸及少連富弼再上疏皆不報  
上初改元曰天聖議者謂天字於文為二人二聖人者  
執政以悅章獻太后也後改明道字於文為日月並猶  
與天聖義同時仍歲旱蝗執政謂宜有變更以導迎和  
氣丁巳詔明年改元曰景祐

歐陽修歸田錄云明道犯契丹諱故遽改恐誤契丹

主隆緒者明記子雖諱明然不應二年始改要是契丹初不問年號但趙元昊以明字犯其父名故輒稱顯道契丹事則未聞今止從詔語

契丹國母遣彰信節度使蕭傳東上

閣門使王秀英國主遣歸義節度使蕭麗將作少監張素羽來賀正旦

戊申詔邊臣毋輒增置堡寨以邀功賞

是歲徙大名之朝城縣于社婆村廢鄆州之王橋渡淄州之臨河鎮避河患也 先是天禧初募人入緡錢粟

帛京師及淮南江浙荆湖州軍易鹽乾興元年入錢貨京師總為緡錢一百十四萬會通泰煮鹽歲損所在積貯無幾因罷入粟帛第令入錢久之積鹽復多於是參

知政事王隨建言淮南鹽初甚善自通泰楚運至真州自真州運至江浙荆湖綱吏舟卒侵盜販鬻從而雜以砂土涉道愈遠雜惡殆不可食吏卒坐鞭笞配徙相繼而莫能止比歲運河淺涸漕輓不行遠州村民頓乏鹽食而淮南所積一千五百萬石至無屋以貯則露積苦覆歲以損耗又亭戶輸鹽應得本錢或無以給故亭戶貧困往往起為盜賊其害如此願得權聽通商三五年使商人入錢京師又置折博務於楊州使輸錢及粟帛

計直予鹽一石約售錢二千則一千五百萬石可得緡錢三千萬以資國用一利也江湖遠近皆食白鹽二利也歲罷漕運糜費風水覆溺舟人不陷刑辟三利也昔時漕鹽舟可移以漕米四利也商人入錢可取以償亭戶五利也贍國濟民無出於此時范仲淹安撫江淮亦以疏通鹽利為言即詔翰林侍讀學士宋綬樞密直學士張若谷知制誥丁度與三司使江淮制置使同議可否皆以為聽通商則恐私販肆行侵蠹縣官請敕制置

司益造船運至諸路使皆有二三年之蓄復天禧元年  
制聽商人入錢粟京師及淮浙江南荊湖州軍易鹽在  
通泰楚海真揚漣水高郵貿易者毋得出城餘州聽詣  
縣鎮毋至鄉村其入錢京師增鹽予之并敕轉運司經  
畫本錢以償亭戶詔皆施行

此事據本志附見年末范仲淹以七月安撫江淮或

可附見七月末更須考詳又恐與五月宰相王隨上淮南運河圖相關

--	--	--	--	--	--	--	--

欽定四庫全書

續資治通鑑長編卷一百十四

宋 李燾 撰

仁宗

景祐元年春正月甲子遣使督江淮漕米以賑京東饑民  
許京兆府立學賜九經仍給田五頃

丙寅詔開封府界諸縣作糜粥以濟饑民諸路災傷州軍亦如之  
命龍圖閣待制燕肅天章閣待制張宗象

同三司詳定在京庫務利害以聞時庫務積物既多吏頗為姦故也

戊辰詔三司鑄景祐元寶錢

庚午給事中集賢院學士李仲容權御史臺理檢院事時樞密直學士右諫議大夫知益州韓億除中丞未至知雜御史出使故也

民役之重者自里正歲滿為牙前主典府庫或輦運官物往往破屋有累世同居因避役遂離析者於是中書



議欲稍寬其法癸酉命龍圖閣待制燕肅天章閣待制  
張宗象同三司議乃請川峽閩廣吳越諸路仍舊制餘  
路募有版籍者為牙前滿三期罪不至徒補三司軍將  
勿復差鄉縣人詔行其說

此據本志聯書實錄在二月丙午

甲戌詔曰天下承平久矣四夷和附兵革不試而邊未  
撤警屯戍尚繁吾民忙從軍籍者多而服農功者寡富  
庶弗臻其殆以此執政大臣其議更制兵農可以利天  
下為後世法者條列以聞河北轉運使刑部員外郎

王公詣闕奏事上所著春秋集傳十五卷復上書以春秋論時事命直昭文館公又言懷衛磁相等州皆有水泉可疏引以溉民田請用前獲嘉縣令西門峰新知將陵縣王良分行諸州規度之詔可又請以洺州廣平兩監牧馬地賦民而每頃令牧官馬一匹出粟二斛詔三司與羣牧司定奪以聞詔天下災傷縣權停造丁產簿俟歲豐如舊賜左街僧錄重珣所脩院名曰寶勝初許重珣建塔至是罷之

丁丑命翰林學士章得象等五人權知貢舉

戊寅詔幕職州縣官任川峽路者聽搬家京朝官如無親屬可倚者亦聽之

己卯命翰林學士石中立張觀權行舍人院制詞以知制誥鄭向胥偃李淑等並權同知貢舉也 詔去歲飛

蝗所至遺種恐春夏滋長其令民掘蝗子每一升給菽五斗既而諸州言得蝗種萬餘石又詔比禁京城穀出門其弛之江淮兩浙諸路毋得閉糴貸淮南貧民種食

壬午以太常博士滕宗諒為左正言宗諒先與劉越同上章獻太后疏請歸政者也

癸未詔曰朕念天下士鄉學益蕃而取人之路尚狹或棲遲田里白首而不得進其令南省就試進士諸科十取其二進士五舉年五十諸科六舉年六十嘗經殿試進士三舉諸科五舉及嘗預先朝御試雖試文不合格毋輒黜皆以名聞自此率以為常

本紀云特奏名者差其舉與年視舊格稍

優之率以為常此據本志

甲申詔諸州軍歲滿都知兵馬使自今且補攝長史司馬三年乃與班行以淮南歲饑出內藏絹二十萬下三司代其歲輸中書言京朝官在職事者並三周年許磨勘其任西川廣南當磨勘者預聽三兩月前上厯任狀於審官院其因事替移及嘗降差遣者並須四年從之

乙酉詔京東西陝西轉運司選官行視諸處水泉可導灌民田者以聞用王公議也

丙戌中書言諸路提點刑獄朝臣使臣並如舊制給御前印紙以書殿最從之

丁亥羣臣上表請聽樂表五上卒不聽始置崇文院說書命都官員外郎賈昌朝屯田員外郎趙希言太常博士崇文院檢討王宗道國子博士楊安國為之日以二人入侍講說初孫奭出知兗州上問奭誰可代講說者奭薦昌朝等因命中書試說書至是始特置此職以處之後三歲乃遷天章閣侍講

四年三月

己丑詔京城諸門置場給貧民米日一升

庚寅聽諸州衙前及無蔭人撲買官酒務 權停淮南

上供錢一年 改繼照堂為繼聖堂

是月趙元昊始寇府州

二月壬辰朔以龍圖閣直學士右諫議大夫權三司使  
事范諷為龍圖閣學士 權停解州鹽池種鹽三年以  
本池所貯可支十年故也 改宣德軍為昭慶軍

癸巳詔三司天下官物冗積者多而歲供帳籍為煩其

委官變易若可上供者悉輦入京師 又詔開封府界  
出常平倉粟貸中等戶以下戶一斛

甲午詔資政殿學士薛奎班翰林學士承旨之上

乙未罷書判拔萃科更不御試自今幕職州縣官經三  
考以上非入緣邊及川廣福建者並許應賢良方正能  
直言極諫等六科其京朝官至太常博士及進士諸科  
取解而被黜落者毋得復應茂材異等三科及武舉用  
知制誥李淑之議也淑嘗上時政十議其一議國體曰



方今襲三帝之祚宜貽法百世大懼優柔曠日而無以振自天禧後章獻密助內治以訖顧命至於陛下繼統十年之間政出房闈內侍放縱邪路萌滋天命有開王塗重輯盡斥憊慝大明軌制而經星弗序善氣猶鬱者殆天之意慮陛下佚於事初以此儆寤之也今災沴既頻賦入有限而用度不足恩賞濫舉吏員滋多而甄別未至居官者以因循自守不務遠圖求進者以必遂為限無嫌苟得近臣外任有固辭而罷者進不滿望或不

即拜有中宿而易者或封章以求台衮或矯偽以圖王  
爵任職則浮夸貢言則擊搏不恥智詐不畏譏誚驕蹇  
貪冒甚非公路臣願陛下號令一出要其必當官職一  
授勿復再易至於國用未足濫官未別冗兵疲馬橫賞  
浮費之類願命近臣知治體者準三朝出入之數而樽  
節之此防微制本之術也其二議災旱曰頻歲以來亢  
陽為孽民多艱阨歲不順成洪範五行曰僭常暘若謂  
僭差則常暘順之又曰土爰稼穡土於人其性信其事

思其為咎也。霄冒其為沴也。稼穡不成。天其意者。謂爵賞過授。近於僭差。號令迭改。非示信。懋朝廷於方獄。大臣不吝命。賜將相。崇秩躡等。而除至於戚里宗室。超越名級。嬪嬙追命。濫擬尊極。軒墀下列。遷補過優。銓筦常資。進陟太廣。此不謂僭差乎。又條制屢改。或前敕未遑究宣。後旨已令廢格。或已授復追。或未下輒止。此不謂號令不信乎。又間者遣使傳開公廩。以賑貧乏。然四民之別。農服田畝。無國家贍養之理。今之兵食吏祿百倍。

於古以此重費可勝既邪又轉饒艱遠濟貸不及或發  
丁運粟或募人貸錢惠未及下下已重擾止是邀名者  
圖市恩而已臣願陛下脩人事以應天變不然徒匱國  
力而未足以弭民災也其三議言事曰陛下臨朝清明  
詢納忠直然獻言之臣多涉矯激肆為詆評不顧理道  
苟飾智詐圖惑聰明意在進身假名疾惡交章累牘須  
報乃已鬻己之直歸過君父豈副陛下詢納之意哉先  
朝有劉驥者輕為奏䟽

祥符八年

先帝語左右曰此人言多

押闔期在必行殊不知近偽亂真詞旨易辨驥嘗枉法  
受賕古人察言觀行正為此也願陛下每於進對之際  
深防邪僻之人辨其誠詐毋輕信用假有稱某人善者  
或大臣意欲援用礙於同列或已有一節之美先借他  
人張本自銜或嘗聞聖獎希旨稱述藉其為援預結朋  
比又有言某人非者或大臣所惡欲其斥去或聞上稱  
譽將有褒陟忌其進用巧為中傷或素懷憎嫉名聲輒  
已結合疑似挾情毀害如此之人姦險萬狀不可不防

真宗常曰姦邪無狀誠難察見若察其好傾人而自進者十見八九此言至要願陛下三省之其四議大臣曰兩府遷易稍頻固有傾邪上孤倚任者然傷陛下簡靜之政矣夫大臣者國之股肱固須審擇太祖定天下用周朝三相猶六年始以趙普代之凡十一年始以薛居正沈倫代之太宗嗣位惟一相盧多遜又六年而用趙普自後十八年中雖三四易相然所用者惟李昉宋琪呂蒙正張齊賢呂端五人當是時進者競於納忠退者

懼而脩省蓋進退宰相皆出睿斷也真宗景德以前三次遷改惟李沆向敏中王旦畢士安寇準五相而已其任王旦十二年次則向敏中再相亦十年此二人在位之日非無疑似之說誠以大度并容推任無間而不重以權故也且權太重則臣下難於久居言易入則小人得以交關太宗嘗謂宰相曰今四方無虞與卿等謹守祖宗經制最為急務此委相之大體也其五議擇官曰太平興國初文武朝官班簿纔二百人至咸平初四百

人天聖元年踰千人自去年覃恩又軼天聖之數矣從  
前選人入京者歲不過數人至有十數考有勞效無殿  
犯近臣屢薦而終不得改秩者遂使遠方大邑皆用幕  
職官承乏今年判官簿尉四考輒得京官者日至四五  
遠邑無闕員又以江浙授之是則推恩太廣於前也先  
朝嘗諭審官院流內銓主判者若灼有能績衆所稱者  
密以名聞當特旨升擢願陛下擇三司主判官密令搜  
訪引對之際如先朝故事行之其老疾懦弱之人間或



退黜庶有所懲勸其六議貢舉曰開寶以前每歲進士  
不過三十人經學不過五十人自克復偽國吏員益衆  
始以廷試廣收士子太宗委之春官自咸平後乃復廷  
試則是以天子之尊而親春官之職且取人太廣又一  
日之藝未極所長數日考覆難盡其當願陛下約今歲  
吏部闕官之數為來年入等之準先委貢院考試然後  
委文學近臣三兩人覆閱可否陛下與執政之臣啟封  
閱名旁采聲實第以科級如此則天下之士可得實才

矣其七議制科曰吏部故事選人格限未至能試判三節謂之拔萃止用疑案古義觀其能否詞美者第優等補官此則有司銓品常調選人判超循資之式而陛下親御軒陛審覆課試非其稱也願罷此科其詞學異衆自可舉才識兼茂詳明吏理之科又禮部茂材異等本求出類之雋頗聞不利鄉薦者始來應書望更為嚴制以革僥冒之人其八議閱武曰開寶通禮有四時講武儀國初疆候未平祖宗多親閱試按礮角射太平興國

後築臺楊村以備大閱真宗咸平初又闢鬪場於東武  
原發卒會射其後再幸飛山教場皆躬親訓練示不忘  
武備方今繼承平之治兵革不用三十年矣遂使連營  
之士不聞鉦鼓之聲孔子有言不教民戰是謂棄之願  
陛下按通禮厲兵講武而躬習閱之其九議時令曰開  
元定禮有明堂及太極殿五時讀令之儀冠服佩玉悉  
為方色月為之今行令不順則五沴應之近歲以來氣  
序繆戾水旱弗節意者有司刑政之間或爽順時之理

天應以異固當變而脩政願陛下申命有司講脩舊禮以氣至之日集文武官讀時令於天安殿至尊升坐近臣伏聽上下交儆以恢和令之美其十議入閣曰唐寶歷後常以月朔御紫宸行入閣儀後雖五代叔擾猶或不廢施及聖朝太祖五行其禮多御崇元殿備殿中金吾諸仗設待制候對官崇元殿即今天安殿也乾德之後改御大明殿即今集英殿也太宗三行其禮別定新儀就文德殿廷增設黃麾仗真宗亦三行之繪圖講習

藏之禁閤茲禮之廢向踰三紀願因盛時脩起之 詔  
殿試舉人考官日迫多不精審自今初考覆考詳定以  
十日為限

丙申命龍圖閣待制燕肅天章閣待制張宗象與三司  
議在京折中倉利害以聞初欲置折中倉以省江淮歲  
漕而議者謂平糴京師則物價翔貴而傷民故今參詳  
之 權弛登萊采金之禁以歲饑民不能自給故也

免益州路災傷州軍殘欠夏稅 詔河北轉運司有進

納斛斗之人先具姓名并石數以聞即降宣補文字候斛斗納足給付

丁酉廢信州玉山縣韓村銀場

己亥詔諸司使副自今特遷正使於本額下五資遷之

為定例

明道二年九月甲子更參詳

磨勘轉授依舊條

庚子詔章懿太后忌前後禁樂各三日不視事各二日

先是召知鳳翔府兵部員外郎司馬池知諫院池上表懇辭上謂宰相曰人皆嗜進池獨嗜退亦難能也加

直史館復知鳳翔嘗有疑獄上讞大理輒復下掾屬惶  
恐引咎池曰長吏者政事所由非諸君過乃獨承其罪  
有詔勿劾

辛丑贈相州觀察使李維為右僕射故事觀察使無贈  
典維嘗為刑部尚書其子比部員外郎師錫請於朝廷  
特贈之 詔禮部貢院諸科舉人應七舉者更不限年  
並許特奏名 詔河北京東淮南比多盜賊其諸州軍  
都監監押聽出城應援巡檢而掩捕之

甲辰權減江淮漕米二百萬石候歲豐補之 命知制誥丁度知諫院孫祖德開封府推官明鎬與三司使副及燕肅張宗象等參議前後所詳定事趣上之

乙巳詔華州進士張公佐與免將來文解禮部貢院未得退落公佐祖國子博士文旦嘗依宣祖以經史教太宗及秦悼王而昭宣使王延德亦從其學至是延德子步軍都虞侯英州防禦使應昌言文旦後人無食祿者故有是命



丁未詔參知政事王隨翰林學士承旨盛度各與一子  
官以嘗詳定解池鹽法也度自言放行解鹽三年收到  
種鹽二百七十五萬八千六百餘斤乞更銓轄兩池廣  
謀種造務令大段增剩故賞及之

度自言  
據會要

戊申詔麟府州發廩粟以賑蕃漢饑民

甲寅詔河東路募人入粟因下諸州自今入粟授官人  
聽預州郡公會其攝助教若犯私罪情狀輕者聽贖三  
犯者奏裁 又詔川峽路轉運使副提點刑獄聽泊家

鄴路而歲一過之母得過十日 新知泰州孔道輔言

父母年老輒暫至兗州寧省乃赴泰州詔道輔不候朝  
旨迂路過兗州特免勘仍令兗州發遣赴本任居數月  
改知徐州

三月辛酉朔追復內殿承制鄭志誠為入內押班仍贈  
和州防禦使志誠天禧中嘗坐與朱能通書搜其家得  
請太子親政表削官流房州而卒特卹之 開封府判  
官謝絳言蝗亘田野全入郭郭跳擲官寺井堰皆滿而

使者數出府縣監捕驅逐蹂踐田舍民不聊生魯三書螟穀梁以為哀公用田賦虐取於民朝廷斂弛之法近於廉平以臣愚所聞似吏不甚稱職而召其變凡今典城牧民有顓方面之勢才者掠功取名以嚴急為術或辨偽無實數蒙獎錄愚者期會簿書畏首畏尾二者政殊而同歸於弊夫為國在養民養民在擇吏吏循則民安氣和而災息願先取大州邑數十百詔公卿以下舉任守州者使得自辟屬縣令長務求術畧不限資考然

後寬以約束許便宜從事暮年條上理狀或徙或留必有功化風迹異乎有司以資而任之者焉漢時詔問京房災異可息之術房對以考功課吏臣願陛下博訪理官除煩苛之令申敕計臣損聚斂之役勿起大獄勿用躁人務靜安守淵默傳曰大祲之禮百官備而不制言省事也如此而沴氣不彌嘉休不至則靈意滿譙而聖言罔惑矣

絳疏不得其月日本傳云還朝為開封府推官即言此絳為府判乃二月丙午也今附月

末案靈意滿譙語不可解然

宋史謝絳傳亦同姑存其舊

濟人黎德潤者性剛

介廉直嘗知衛真縣州吏受賕德潤告之坐決勒者十  
餘人吏因共誣德潤以罪收繫獄自縊死彭城顏太初  
賦詩發其寃范仲淹前使江淮請加追卹於是詔賜德  
潤家錢三萬太初顏子四十七世孫也

丙寅右班殿直龍惟亮言廣州瀕海煎鹽戶輸官鹽每  
斤給錢六文廣惠端三州官鬻鹽斤為錢十五文故民  
間多私販者請減為十文從之

癸酉詔審官院京朝官知縣入通判通判入知州嘗坐

罪至徒者自今須大兩省以上二人或帶職朝臣三人保舉始聽闕陞其嘗被體量罷懦及昏昧者毋得舉

丙子詔御試進士題目書所出摹印給之更不許上請知邢州殿中侍御史張奎母病奎輒刺股肉和藥以進母遂愈丁丑賜奎綿帛羊酒及母死奎廬於墓自負土植柏人服其孝

戊寅御崇政殿試禮部奏名進士己卯試諸科辛巳試特奏名已而得進士張唐卿楊察徐綬等五百一人諸

科二百八十二人特奏名八百五十七人賜及第出身  
同出身及補諸州長史文學如舊制惟授官特優於前  
後歲唐卿察綬並為將作監丞通判諸州第四第五人  
為大理評事簽書節度州判官第六人而下並為校書  
郎知縣第二甲為兩使幕職官第三甲為初等幕職官  
第四甲為試銜判司主簿尉第五甲為主簿尉唐卿青  
州人察合肥人綬山陰人起子也

是年天子待進士恩  
禮加於前後歲此據

劉攽所作  
徐綬墓銘

壬午免諸路災傷州軍今年夏稅支移折變仍減價糶廩以濟貧民

癸未降右正言劉渙為殿中丞通判磁州渙前監倉并州既入為諫官乃以書遺營妓走馬承受張承震得其書繳奏之故責解州兩池畦戶積逋鹽三百三十七萬一千四百四十六席詔蠲其半

乙酉出內藏庫絹五十萬下發運司市糴軍儲發運使李繹言百姓凶饑之餘不宜重擾詔止之繹居淮南半



年徙延州漕課視常歲增五之一

止不市絹橐李繹傳實錄無有也當考

夏四月辛卯賜高麗國賓貢進士康撫民同出身仍附

春榜減河南府田稅十之一

壬辰詔鑠廳舉人所試不合格者除其罪始天禧二年

宰相王欽若請鑠廳舉人試不合格者並坐私罪至是

始除之

天聖四年閏五月辛未已有詔鑠廳應舉者下第免責罰今復有是詔當是前詔止為下第今

詔并指取解故也

甲午贈故翰林學士禮部侍郎知制誥楊億為禮部尚

書賜謚曰文國朝故事非嘗任二府及事東宮則四品  
無贈官樞密使王曙言億嘗為寇準草奏請太子親政  
為丁謂所排不得志而沒準既贈中書令億宜蒙旌賁  
故特贈之初準令億草奏曙知其不可嘗勸止準準敗  
曙取奏草付其妻縫置夾衣中及朝廷欲理準舊勲曙  
乃出之其字漫滅幾不可識矣鎮國節度使駙馬都尉  
李遵勗乞加賜億忠字奏雖不行詔送史館

龍川別志  
載王曙藏

楊億草稿及勸止寇準事當得實但云立太子廢劉后  
逐丁謂遣曙出使誅不附己者則誤矣天禧四年六月

準罷相時已詳辨之 魏恭記事云追贈楊億由李遵  
勗論列與別志不同今從別志遵勗蓋乞加謚忠字爾  
事見會要  
今附見 賜三路緣邊部署鈐轄將校臘茶

丁酉殿中侍御史龐籍為開封府判官尚美人遣內侍  
稱教旨免工人市租籍言祖宗以來未有美人稱教旨  
下府者帝為杖內侍切責美人詔有司自今宮中傳命  
毋得輒受

庚子契丹國母遣右威衛上將軍耶律迪利州觀察使  
王惟永國主遣廣德節度使耶律述永州觀察使高昇

來賀乾元節 美人尚氏父繼斌為右侍禁從父繼因

繼能並為右班殿直

按實錄明道元年五月乙未以後宮尚氏父延福為國子助教今尚

氏父又名繼斌不知何故本傳亦云繼斌無所謂延福者豈延福別一尚氏父乎當考

辛丑賜光祿寺丞劉玘同進士出身其妻父樞密副使  
李諮為請也仍詔自今獻文及恩例與試者更不賜及  
第但賜出身同出身玘綜孫也

壬寅賜定襄縣民陸珪家米五十斛帛五十疋仍復其  
役以珪家七世無異爨故也

癸卯乾元節羣臣上壽於紫宸殿

丙午罷大宴命參知政事王隨押賜契丹使御筵於都  
亭驛用教坊樂

丁未出內藏絹三十萬下河北轉運司市糴糧草

癸丑詔御史臺置殿中侍御史監察御史裡行舉三丞  
以上嘗厯知縣人候二年除御史又二年除三司開封  
府判官從中丞韓億之請也然唐制亦有侍御史裡行  
今獨遺之億始還自益州因言維茂州地接羌夷蕃部

歲至永康官場鬻馬寢熟道路險易慮其覘兩川請徙  
場黎州境上從之

此事不得其  
時今附此

丁巳詔災傷之民死而不能收斂者官為埋瘞仍祭酹  
之 詔直史館宋祁鄭戩國子監直講王洙同刊脩廣  
韻韻畧仍命知制誥丁度李淑詳定時祁等言廣韻韻  
畧多疑混字舉人程試間或誤用有司論難互執異同  
乃致上煩親決故請加撰定 新江東轉運使蔣堂言  
竊見諸路差武臣知州軍等多是素昧條教不知民事

欲乞自今除扼要邊陲之處合選任近上武臣外其餘

州軍即改差文資上令諭樞密院今後差武臣知州軍

並須擇人

會要景祐元年四月二十九日事

五月庚申朔詔知藩郡及轉運使未至所部不得奏辟

屬官

辛酉出布十萬端易錢糴河北軍儲

壬戌減廉化高三州田稅

癸亥知宣州兵部員外郎劉隨為工部郎中知應天府

故事奉使契丹者遣皇城卒二人與偕察其舉措使者  
悉姑息以避中傷隨前賀契丹國母生辰以病足痺不能  
拜為皇城卒所誣有司劾奏奪一官出知信州徙宣州  
踰年未復既而天章閣待制李紘賀契丹主生辰還具  
言其枉乃遷隨南京

乙丑翰林侍讀學士兼龍圖閣學士工部侍郎權知開  
封府陳琳為三司使丙寅詔自今三司使在職未久毋  
得非次更易於是琳在三司閱四年遂得政或請募人



輸粟京師以罷江淮漕運琳曰如猾商邀價而粟不至奈何先是三司併合田賦訟納諸名品為一物琳謂借使牛皮食鹽地錢合為一穀麥黍豆合為一易於勾校可也然後世有興利之臣復用舊名增之是重困民無已時也琳在三司尤謹出入禁中有所取輒覆奏罷之內侍表言琳頗琳聞之自直於帝曰三司賦財皆朝廷有也臣為陛下惜耳於臣何有帝然之

明道二年十月併諸名品為一

物既已施行琳但有此議論耳

琳又上疏論兵在精不在衆河北陝西

軍儲數匱而招募不已其住營一兵之費可給屯駐三兵昔養萬兵者今三萬矣河北歲費芻糧千二十萬其賦入支十之三陝西歲費千五百萬其賦入支十之五自餘悉仰給京師自咸平逮今二邊所增馬步軍指揮使百六十計騎兵一指揮所給歲約費緡錢四萬三千步兵所給歲約費緡錢三萬二千他給賜不預合新舊兵所費不啻千萬緡天地生財有限而用無紀極此國用所以日屈也今同華汾河州軍積粟至於紅腐而不

知用沿邊入中粟價踴貴而未嘗足誠願罷河北陝西募住營兵勿復增置遇缺即選廂軍精銳者補之仍漸徙營內郡以便糧餉無事時番戍於邊緩急即調發便近嚴戒封疆之臣毋得侵軼生事以覲恩賞違令者重寘之法如此則疆場無事而國用有餘矣帝嘉納焉此疏

據本志在景祐元年今附見琳為三司使後明年三月任布知成德軍議河北兵未可省必緣此疏也當考

丁卯禁民間織錦背繡背及遍地密花透背西川歲織上供者亦罷

己巳詔中書堂後官自今遷至員外郎並與外任提點五房公事三年者代之

庚午詔諸路提點刑獄廳舍與轉運使副同在一州者並徙他州 又詔如聞戚里之家多與朝士相接或漏禁中語其令有司察舉之

辛未御崇政殿西廡召輔臣觀講書罷軍頭奏事自是遂為例 詔三司吏有能上錢穀利害可施行者當非次遷補之 祕書丞張宗誼孫沔並為監察御史裏行

監察御史裡行始此沔會稽人也

壬申出內藏庫緡錢一百萬賜三司以河南府府學

為國子監後唐同光三年初建文宣王廟咸平三年重脩舊止名府學於是直集賢院謝絳論奏乃正監名

癸酉詔臺諫官未嘗厯知州者且與知州

甲戌御崇政殿閱諸軍轉員凡三日

丁丑禁民間以歲豐率錢為感聖恩道場

壬午御崇政殿錄繫囚

癸未詔太常禮院永定陵歲時薦獻之物非典禮者罷之

乙酉詔舉人被囚而獄吏苛酷非疾致死者提點刑獄官按察之募告者賞錢十萬公人遷一資同犯而能自告者除其罪給賞如之尋又詔州縣官非理科決罪人致死雖係公罪者本處未得批罰奏聽裁

詔乃六月乙卯今并書

六月己丑朔賜陳州揚州學田五頃

壬辰遣職方員外郎沈厚載往懷衛磁相邢洺鎮趙州

教民種水田 廣東轉運司言交州陳公永等六百餘

人內附李德政發兵境上捕逐詔遣公永等還仍諭德政撫存之樞密使蔡齊言蠻去暴歸有德請納之給以荆湖間田使自營今縱去必不復還舊部若散入山谷如後患何不聽明年蠻果為亂王蒙正子齊雄嘗坐殺人除名齊雄章獻姻家未更赦復官事下樞密院樞密使王曙將奉行之齊曰如此法撓矣安可奉行且度曙不能執明日獨奏齊雄恃先后勢殺人不死又亟復官

是以思廢法也帝曰降一等與官可乎齊固稱不可帝

從之

據成都金繩院柱記天聖十年蒙正以國子博士知鳳翔齊雄為三班奉職不知後遷何官

癸巳免沂州四季鹽鐵錢一年

丙申詔三班院舊制使臣監當一任即為巡檢監押自今更增近地監當一任

丁酉詔文武臣僚失儀而被罰者自今勿以為過京

東轉運司言濟兗間素多間田青州都監郝仁禹頗知田事請令規度水利募民耕墾從之



己亥以戶部副使王泂兼管勾開畝河澆灌民田事泂  
自請之也 貸延州緣邊饑民米戶三斛

庚子詔廊延路鈐轄司毋得令熟戶蕃寇鈔境外 蠲  
畿內被災民稅之半

淮南制置發鹽運使劉承顏獻輸扇浴器同知諫院郭  
勸言此非所宜獻承顏欲以此媚上爾乞付外毀棄以  
戒邪佞甲辰詔還之 左屯衛將軍馬季良安置滁州  
遣人擊登聞鼓得致仕侍御史知雜事楊偕言致仕所

以優賢季良既貶斥不當得有詔劾鼓司御史中丞韓  
億以為事之行不行在執政有司何罪乃納敕中書上  
以億當奏草取旨不當擅納敕書特釋之仍劾鼓司官  
吏法寺言官吏當贖金亦釋之

據會要乃六月十七日乙巳事

詔開

封府自今有傳宣指揮依例次日上殿面奏取旨先是  
有旨本府後行扈玉轉守門前行乃越百餘人判官龐  
接以為言故降是詔

丙午以應書判拔萃科潞州司法參軍江休復為大理

寺丞張伯玉林億閭詢並除兩使幕職官休復陳留人

億開封人詢鳳翔人也

二月乙未已罷書判拔萃科不知江休復等何故猶以應科除

官按登科記云是年春詔今後更不置此科六月令已應科人不御試休復蓋是不御試徑除官者

已酉策試賢良方正能直言極諫太常博士蘇紳才識  
兼茂明於體用大理寺丞吳育茂才異等張方平及武  
舉人於崇政殿育所對策不及三千字特擢之以育為  
著作佐郎直集賢院通判湖州紳為祠部員外郎通判  
洪州方平為校書郎知崑山縣方平宋城人紳晉江人

育建安人也自秦悼王葬汝其後子孫從葬皆宦官典護又歲時上冢者不絕往來呼索擾州縣育前知襄城縣乃建言凡官所須必著實數毋容使者妄索若羊豕之類願悉出太官由是民省供費十七八宦官過者銜之或中夜扣縣門索牛駕車育拒不應異時宗子所過縱鷹犬暴民田入襄城輒相戒約毋敢縱者初吳越歸國郡邑地曠民占田無紀歲久多侵越訟數十年不能決方平召問所輸租稅幾何大約百一二方平悉收其

餘以賦貧民自是無訟

壬子出內藏庫緡錢五十萬下三司於瀕河州縣置場  
糴麥先是京東旱麥不時種故也

癸丑詔尚書省官嘗厯知州而無贓私罪者今後並除  
左曹凡吏部戶部禮部為左名曹司封司勲考功度支  
金部倉部祠部主客膳部為左曹兵部刑部工部為右  
名曹職方駕部庫部都官比部司門屯田虞部水部為

右曹

天禧三年十月可參考

甲寅詔待制以上歲遇乾元節已奏薦子弟恩澤其除  
外任非益梓秦延并廣等六處毋得更有陳乞其再經  
郊裡欲以恩例奏異姓者聽之

乙卯中書言太常博士李柬之先於學士院試賜同進  
士出身館閣校勘詔除直集賢院知邢州柬之廸子也  
天禧末廸罷相斥逐柬之落職廸復相柬之自陳於政  
府奏乞檢會乃有是命議者非之或曰廸與呂夷簡同  
相廸直而疎夷簡巧而密廸嘗有所規畫夷簡覺非廸

所能乃問其所親曰復古門下誰適與謀對以李無他客獨柬之慮事過其父遠甚夷簡因謂迪曰柬之才可用當付以事迪謙不敢當夷簡曰進用才能自夷簡事

公弗預知即具奏得請迪父子皆喜不悟夷簡陰奪其

謀主也柬之既受命居半歲迪果罷相

此據龍州別志然別志以為夷

簡奏除柬之兩浙提刑於實錄及柬之本傳皆不見歷兩浙提刑恐即是除直集賢院知邢州也觀夷簡正欲柬之不在其父旁耳故起除直集賢院令出守而迪之父子不悟恐別志誤記今畧加刪削附見此事

是月開封府淄州言蝗

閏六月戊午朔詔天下有能告殺人者賞錢五萬 賜

杭州學田五頃

己未以東頭供奉官朱吉為內殿崇班左侍禁田繼永

為西頭供奉官並與極邊差使初詔求嘗隸馬知節曹

瑋麾下者以名聞至是得吉等拔用之

朔歷景祐四年十月得殿直孫

皓實錄無之今不取

辛酉命翰林學士張觀知制誥李淑宋祁編三館秘閣書籍仍命判館閣盛度章得象石中立李仲容覆視之



壬戌貸慶州蕃部米戶一斛 權停登萊二州科買上  
供物

甲子泗州言淮汴溢

乙丑府州言趙元昊自正月後數入寇詔并代部署司  
嚴兵備之

己巳詔審官院自今川廣知縣毋得差有贓罪人 江  
南東路今年夏稅聽民輸見錢以久雨害稼也 常州  
言無錫縣大風發屋賜壓死者家三口以上錢三千不

及者半之

庚午詔凡有營繕使臣人員工匠並量與支賜毋得輒  
求遷補 黎州言邛部川蠻乞歲貢方物京師詔令五  
歲一入貢

壬申詔乾元節度僧道及賜紫衣法號皆以一百人為  
額仍令入內侍省置簿拘轄之 徙益州路提點刑  
獄司解舍於眉州

甲戌賜知泗州都官員外郎張夏敕書獎諭時雨彌月

不止淮汴溢幾沒城夏親帥丁夫捍禦而城不壞民賴

以安故也尋遷夏司封員外郎

明年七月  
除江西漕

乙亥毀天下無名額寺院

辛巳詔比因饑饉民有雇鬻妻子及遺棄幼稚而為人  
收養者並聽從便

壬午罷後苑作所用玳瑁龜筒先是三司言後苑作市  
龜筒玳瑁有逾期不輸者上曰前詔禁采龜筒安可復  
市於民其罷勿市所造玳瑁器亦停從度支判官謝絳

之言也

從絳言  
據本傳

絳又言內藏庫歲受鑄錢百餘萬緡而

歲給左藏庫及三年一郊度歲出九十萬緡所餘無幾  
請以天下所鑄錢盡入三司十年責以移用使聚穀實  
邊而茶鹽香礬之利悉歸京師與夫滯積大盈利害遠  
矣又邇來用物滋侈賜予過制禁中須索去年計為緡  
錢四十五萬自今春至四月已僅二十萬比詔裁節費  
用而有司移文但求咸平景德簿書書不存則無所措  
置臣以為不若推近及遠遞考歲用而裁節之不必咸

平景德為準也又言號令數變則虧體利害偏聽則惑聰請者務欲各行而守者患於不一請罷內降凡詔令皆由中書樞密院然後施行

甲申詔御試制科舉人自今張幕次於殿廡仍令大官給食武舉人以別日試之時知制誥宋郊言賢良茂才等科上所親策乃與武舉人雜試非所以待天下特起之士也宜如故事命有司設幄供飲膳斥武舉人就別館詔從郊請

乙酉前西京留守推官歐陽修為鎮南節度掌書記館

閣校勘樞密使王曙所薦也修安福人

案歐陽修宋史作廬陵人其文

集亦自稱廬陵歐陽修此作安福人非是

詢之裔孫始錢惟演留守西京修

及尹洙為官屬皆有時名惟演待之甚厚修等遊飲無

節惟演去曙繼至數加戒敕嘗厲色謂修等曰諸君知

寇萊公晚年之禍乎政以縱酒過度耳衆客皆唯唯修

獨起對曰以修聞之寇公之禍政以老而不知止耳曙

默然終不怒更薦修及洙置之館閣議者賢之

修洙得館職據

會要皆王曙所薦或稱責歐陽修乃王魯非也錢惟演以明道二年九月去西京曙即繼之曙尋拜樞密使景祐元年正月王魯始為留守度其至時脩已不在西京矣今從本傳然曙既死是年九月洙初除館閣校勘蓋曙先薦之也







# 欽定四庫全書

史部

續資治通鑑長編卷一百十五  
六

詳校官檢討<sub>臣</sub>劉錫五

刑部郎中<sub>臣</sub>許兆椿覆勘

纂修官編修<sub>臣</sub>今佐御史<sub>臣</sub>郝玉藻

謄錄監生<sub>臣</sub>俞錫玉

欽定四庫全書

續資治通鑑長編卷一百十五

宋 李燾 撰

仁宗

景祐元年秋七月己丑權停解州鹽池種鹽三年

庚寅詔淮南災傷州軍為盜而非殺人者限兩月自陳  
除其罪少壯者刺隸本城若有武勇即部送京師與隸  
近上禁軍

辛卯翰林學士承旨盛度等上所定學士舍人院召試人等第以文理俱高為第一文理俱通為第二文通理粗或文粗理通為第三分上下文理俱粗為第四分上下紕繆為第五凡七等先是考校舊規有優稍優堪稍堪平堪低次低七等而品第高下未明至是度等約禮部式更定之

壬辰胡旦妻盛氏上旦所撰續演聖論錄其姪拱辰為太廟齋郎太常博士監察御史裏行高若訥為主客

員外郎殿中侍御史裏行殿中侍御史裏行始此若訥  
衛州人也

乙未御崇政殿召近臣觀景祐乾象新書初命同判司  
天監楊惟德等以周天星宿度分及占測之術纂而為  
書成三十卷至是上之惟德等皆遷官翰林學士承

旨兼端明殿學士盛度召對承明殿西廡問以邊計退  
而條十事上之又兼翰林侍讀學士翰林侍讀學士  
兼龍圖閣學士右諫議大夫范諷為給事中依前龍圖

閣學士知兗州諷性倜儻好奇節不拘細行雅善李廸  
嘗與張士遜議事不合諷曰世謂大事未易可議小事  
不足為所為終何事耶為中丞力擠士遜援呂夷簡入  
相又合謀廢郭后欲夷簡引已置二府然夷簡憚諷終  
不敢薦也諷建議朝廷當差擇能臣留以代大臣之不  
稱職者夷簡聞而惡之權三司使半歲以疾免管勾祥  
源觀又徙會靈觀既久不得意憤激求出又在上前數  
毀短參知政事王隨因奏外人謂臣逐隨將取其位願

先出臣臣為陛下引姦邪去而朝廷清矣及將行復謂上曰陛下朝無忠臣一旦紀綱大壞然後召臣將何益夷簡愈惡之故尋被譴黜

已亥詔諸路監司案所部官吏不法者須密切體訪毋得出榜召人首告

此詔徧下諸州今在處法司有之實錄所書比元詔稍異今參取修入與

熙寧四年七月二十六日指揮相關

又詔州縣刑獄須證逮者速決遣

之慮久繫妨農事也徙濟州鄆城縣於盤溝店樞

密使吏部侍郎檢校太傅王曙加同平章事

庚子詔諸處承準宮闈教旨未得施行內有該合上殿處仰次日審奏取旨不該上殿處即當日內具事由實封申中書樞密院取旨

辛丑詔諸路提點刑獄朝臣使臣自今毋得互相薦論乙巳隨州言崇信軍節度使錢惟演卒特贈侍中命官護葬事惟演始以父歸國故亟顯然自以才能進文辭清麗名與楊億劉筠相上下嘗曰翰林學士備顧問司典誥於天下之書一有所不觀何以稱職故益儲文籍

侔祕府又多藏古書帖名畫喜獎勵後進歐陽修尹洙  
皆出幕下雖官兼將相階勲品皆第一而終不歷中書  
故嘗謂人曰吾生平不足者惟不得於黃紙尾押字耳  
天下常平倉置已久領於司農寺壬子始詔諸路轉運  
使與州長吏舉所部官專主常平錢粟既而淮南轉運  
副使吳遵路言本路丁口百五十萬而常平錢粟才四  
十餘萬歲饑不足以救卹願自經畫增為二百萬他毋  
得移用許之

吳遵路上言乃景祐三年  
四月今從本志聯書之

樞密直學士



杜衍亦嘗建議曰歲有豐凶穀有貴賤計本量委散滯  
取贏宜究其術若官以法平之則農人有利粟有所洩  
今豪姓蓄賈乘時賤收而拙業之人旋致罄竭水旱則  
稽伏而不出須其翔踴以牟厚利而農民貴糴九穀散  
於穰歲百姓困於凶年雖勸課官家至日見亦奚益於  
事哉蓋常平制度不立有名而無實謂宜量州郡遠近  
戶口衆寡時有饑熟取賤出貴嚴以賞罰課責官吏出  
納無壅增損有宜公糴未充則禁爭糴以規利者糴畢

而儲之則察其以供軍為名而假借者夫香象珠璣久藏府庫非衣食之急若州郡闕無錢願勅賣以賜之補

助其乏

行傳載常平議在行為中丞後今擬出附見行為中丞蓋明年二月也

甲寅冬官正張奎言自今朔若遇部首請勿避上令中書詔司天監參議而判監丁謹言請如舊制避之詔卒從奎議蓋太一者天皇之使常在北極之旁執計上下統元奉命循行八宮十九年為一章四章為一部凡月朔與所入部首支干同即主有兵事也

澶州言河決橫壠埽乙卯命戶部副使王泂供備庫使

孫昭等視之

孫昭未見

先是慶州柔遠蕃部巡檢威布領兵入夏州界攻破後  
橋新修諸堡是月趙元昊率萬餘衆來寇稱報仇緣邊  
都巡檢楊遵柔遠寨監押盧訓以騎七百戰於龍馬嶺  
敗績環慶路都監齊宗矩走馬承受趙德宣寧州都監  
王文援之次節義烽通事蕃官言虜多伏兵不可過壕  
宗矩不聽伏兵發宗矩被執久之以宗矩還詔永興軍

劾宗矩等敗軍狀以聞

八月乙未罷京東安撫使知青州禮部尚書夏竦加刑部尚書賜轉運使刑部郎中楊日嚴兵部員外郎張存三品服以所部歲饑而賑濟有勞也

庚申遣入內供奉官周惟德往環慶路體量邊事以趙元昊數入寇也徙知定州龍神衛四廂都指揮使永州防禦使劉平為環慶路副使部署上初擢平主四廂謂左右曰平所謂詩書之將也平在定州嘗建言臣前在陝

西見元昊車服僭竊勢且叛矣宜嚴備之不聽及是又  
戒平曰知卿有將畧故委以邊寄卿其勉之加賜錢百  
萬資政殿學士戶部侍郎薛奎卒始奎以病罷政上  
手書禁方賜之會小間入見即歸疾復作遂不起贈兵  
部尚書謚簡肅奎在政府謀議無所迎避或時不得如  
志歸輒嘆咤不食家人笑曰何必如是奎曰吾仰慙古  
人俯愧後世爾尤善知人范仲淹龐籍明鎬自為吏部  
選人皆以公輔許之後卒如其言歐陽修王拱辰皆其

女婿也

辛酉河陽三城節度使同平章事判陳州楊崇勳落平章事知壽州崇勳子閤門祇候宗說監濟州稅先是內侍押班周懷信言兄懷政天禧中給事東宮最取親信姦臣謀危皇嗣心懷忠憤議除儉黨為崇勳及楊懷古誣告被誅今懷古雖死而崇勳尚居將相乞正其事以慰幽魂故有是命懷古弟供備庫使懷志子閤門祇候永孚入內高班永德入內黃門永誠永遷並坐降絀

知制誥李淑言太常博士直集賢院黃鑑嘗同修三朝寶訓書垂就而死請錄其嗣詔以鑑子敏為郊社齋郎壬戌有星孛于張翼長七尺濶五寸十二日而沒

癸丑樞密使吏部侍郎檢校太傅同平章事王曙卒贈太保中書令謚文康曙方嚴簡重有大臣體嘗言人臣患不節儉今居第多踰僭服玩奢侈僕妾無數宜有經制及貴顯故深自抑損喜學浮屠齋至蔬食泊如也子益恭以陰為衛尉寺丞性淡於榮利慕唐王龜為人數

解官曙始參知政事治第西京既成益恭作書陳止足之義勸曙謝事退居道引服食以養壽命曙為詩答之然卒不果去益恭終父喪遂以司門員外郎致仕日閱古書竒畫自適間與浮屠隱者出遊洛陽名園山水無不至云

甲子宰臣呂夷簡等上表請立皇后 詔涇原環慶秦鳳廊延路部署鈐轄司察緣邊堡寨都監監押巡檢有畏懦不任事者以名聞 參知政事宋綬以帝富於春



秋天下無事慮燕樂有漸乃上言自古守成之君皆兢兢抑畏不忘顧省何者人心逸於久安而害生於所忽故立防於事之始銷變於未萌之前若事至而應不亦殆與臣願飭勵羣司勿以承平自怠又馭下之道有三臨事尚乎守當機貴乎斷兆謀先乎密能守則姦莫能移能斷則邪莫能惑能密則事莫由變斯安危之所繫願陛下念之至若朝務清暇深居閒燕聲味以調六氣節宣以順四時愛養玉躬使不至傷過乃保和平無疆

之福也

戊辰上不豫

己巳賜環慶路經戰卒緡錢

庚午天平節度使檢校太師同平章事王曾為吏部尚書同平章事樞密使南京留守推官奉符石介貽曾書曰伏聞驛騎走西洛召相公入為樞密使社稷幸甚皇上聰明神聖英威武睿即位十有三年不好遊畋不近聲色恭儉之德聞於天下觀去年自四月一日之後陛

任賢俊黜退姦慝發號施令風行雷動可謂尸居而龍興水默而神竦惟幾也成天下之務惟深也通天下之志惟神不怒而威不疾而速矣睿知類乎唐太宗資才高於漢武帝是時四夷側耳震駭海內聳目鼓舞人人自以為逢堯舜家家自以為登太平正月以來聞既廢郭皇后寵幸尚美人宮庭傳言道路流布或說聖人好近女室漸有失德自七月八月來所聞又甚或言倡優日戲上前婦人朋淫宮內飲酒無時節鐘鼓連晝夜近

有人說聖體因是嘗有不豫春秋傳曰是為近女室疾如蠱非鬼非食惑以喪志斯不得不為慮也太祖太宗真宗三聖人以天下相傳授至於陛下陛下當復傳於子傳於孫以至於億萬世也今聖嗣未立聖德或虧血氣未定戒之在色酒淫內荒萬一成蠱惑之疾社稷何所屬乎天下安所歸乎今見變異人心憂危白氣徹霄凶災薦歲此天地神靈所以示勸戒警悟於陛下也見災而懼猶或變禍為福若日不悛災益深而禍益長也

為國家者可不為深慮相公昔作元台今冠樞密中外更踐華夏具瞻社稷安繫於相公社稷危亦繫於相公相公久去近侍方自外來聖眷至深君心所屬當此之時即宜以此為諫諫止則已諫不止則相公請辭樞密之任庶幾有以開悟聖聰感動上心也若執管仲不害霸之言以嗜慾間事不可極爭則遂啟成亂階恐無及矣伏惟相公留意焉勿謂狂夫之言不足採聽斯乃國家計也相公或罪其狂計賜之誅戮固所甘心既疎賤

在外不得極陳一言受斧鉞於天子之前以狂訐得罪  
於相府亦其死所也

辛未以星變大赦避正殿減常膳出內藏庫錢優賞在  
京將士 詔輔臣延和殿閣奏事其諸司事權令輔臣  
處分

壬申詔淨妃郭氏出居於外美人尚氏為道士洞真宮  
楊氏別宅安置曩者母后臨朝臣僚戚屬多進女口入  
內今悉遣還其家長秋之位不可久虛當求德門以正

內治郭后既廢尚楊二美人益有寵每夕侍上寢上體  
為之癰或累日不進食中外憂懼皆歸罪二美人楊太  
后亟以為言上未能去入內都知閭文應早暮侍上言  
之不已上不勝其煩乃領之文應即命輦車載二美人  
出二美人泣涕詞說云云不肯行文應搏其頰罵曰宮  
婢尚何言驅使登車翼日降是詔初蔡齊力爭削遺詔  
中太后參決軍國大事之語呂夷簡嘆曰蔡中丞不知  
吾豈樂為此哉上方年少恐禁中事莫有主張者爾及

二美人爭寵恣橫卒賴太后排遣之或謂夷簡意實在此然議者以為人主既壯而母后聽政自非國家令典雖或能整齊禁中而垂簾之後外戚用事亦何所不至齊之力爭不為失也

逐二美人據記聞呂夷簡論蔡齊振龍川別志

度支判

官兵部員外郎直集賢院謝絳為契丹生辰使內閣承制閣門祇候李守忠副之度支判官刑部員外郎直集賢院段少連為正旦使供奉官閣門祇候杜贊副之

契丹法天太后專制其國用蕭氏兄弟分監南北蕃漢



事蕭氏奴團練防禦節度觀察使者至四十人范陽無  
賴輩以故多占名為蕭氏奴契丹主以上尊酒銀帶賜  
樂工太后怒鞭樂工契丹主疑內品告太后使左右殺  
內品一人太后愈怒下吏雜治語連契丹主契丹主曰  
我貴為天子乃與囚同答狀鬱鬱不平即與耶律意孫  
謀率兵逐太后以黃布車載送慶州守聖宗冢遂殺永  
興宮都總管郭沁格及內侍數十族命內庫都提點王  
繼內侍都知趙安仁等監南北面蕃漢臣僚每歲遣使

賀契丹主生辰正旦并及其母於是罷之

聖宗乃隆緒廟號王向子

直嘗以契丹降人田瑋所言書敵事載契丹徙其母於博瀉沙中恐即此也然考按多不合今不取

甲戌司天言孛星不見

降六宅使從演為六宅副使東八作副使從湜為內殿承制仍絕朝謁母莒國夫人何氏坐不能導訓自今母得入內右侍禁尚繼斌左班殿直尚繼恩繼能並除名從演嘗以婢遺尚美人從湜受美人所寄金又為訪求其父繼斌故皆責之丙子編管繼斌於鄧州繼恩湖州

繼能滁州從演從湜皆德芳孫也踰年乃復從演從湜  
官仍許朝謁 廢信州寶信縣為鎮

壬午降皇城使英州刺史王懷節為左驍騎將軍坐其  
弟懷德婦持貨私遺尚美人求管軍上以其父繼忠嘗  
陷契丹不欲重貶之

殿中侍御史龐籍言故駙馬都尉吳元扆從子東頭供  
奉官守則近與尚繼斌結婚前權三司使范諷遺以金  
鞍勒守則監左藏庫諷為矯奏羨餘改一官請付臺鞫

其事宰相李迪雅善諷寢不報乙酉籍與左司監滕宗諒並坐言宮禁事不實改祠部員外郎出籍為廣東轉運使宗諒知信州宗諒嘗以上體多疾奏疏諫內寵其略曰陛下日居深宮流連荒宴臨朝則多羸形倦色決事如不掛聖懷語太切直故出

宗諒疏  
據記聞

始上不豫侍醫數進藥不效人心憂恐魏國大長公主薦翰林醫學許希診曰鍼心下包絡之間可亟愈左右爭言不可諸黃門請身試之無所害遂以鍼進上疾愈

九月戊子授希翰林醫官仍賜緋衣銀魚及器幣希拜謝已又西嚮拜帝問其故對曰扁鵲臣師也今者非臣之功殆臣師之賜敢忘所師乎乃請以所得金創扁鵲廟為築廟於城西隅封神應侯其後廟益完學醫者歸趨之因立太醫局於其旁希開封人也

己丑羣臣上表請御正殿復常膳表三上乃從之

辛卯樞密院言陝西緣邊戍兵多為大將選置麾下及偏裨臨陣鮮得精銳自隨請自今以全軍隸逐將毋得

擅有占留從之

壬辰羣臣上表請雙日不視朝從之仍詔中書樞密院

雙日有合奏事亦許便殿請對

十二月末  
孫沔云云

癸巳詔每歲十月遣宗室正刺史以上一員朝拜諸陵  
先是孟冬拜陵止令內司賓往滄州觀察使守節言非  
所以致虔恭也請以身先之詔從其請

丁酉帝康復御正殿復常膳降司農少卿王貽慶在

京監當初貽慶子渙知鉅野縣坐納賂貶汝州長史貽

慶姪女為宗室從湜婦貽慶嘗私使請於禁中下開封府劾其罪既責貽慶徙渙虢州

范仲淹知睦州不半歲徙蘄州州比大水民田不得耕仲淹疏五河導太湖注之海募游手興作未就又徙明州轉運使言仲淹治水有緒願留以畢其役庚子詔仲淹復知蘄州免天下第九等户支移折變

辛丑免舒州懷寧縣民輸折役茶從范仲淹安撫淮南時所請也太子少傅晁迥既與太清樓宴後復召對

延和殿問洪範雨暘之應迥據經以對帝出迥嘗所  
上神僊可學致篇面令剖析既而獻斧戾恤刑歲大順  
審刑無盡燈頌凡五篇忽感疾絕人事屏醫藥具冠服  
而卒年八十四詔罷一日朝贈太子太保謚文元迥樂  
易純固服道履正雖貴勢無所屈嘗言歷官臨事未嘗  
挾情以害物危人以自進生平修身謹行如免膚髮之  
傷真宗數稱迥長者楊億謂迥所作書命無過褒得代  
言之體喜質正經史疑義標括字類無一日廢學不喜



術數有以命術語之者迥曰自然之分天命也樂天不  
憂知命也推理安常委命也何必逆計未然乎

江休復  
雜志云

迥不信天書本傳  
無所見今附此

尚楊二美人之出宮也帝令參知

政事宋綬面作詔云當求德門以正內治既而左右引  
壽州茶商陳氏女入宮綬諫曰陛下乃欲以賤者正位  
中宮不亦與前日詔語戾乎後數日樞密使王曾入對  
又奏引納陳氏為不可上曰宋綬亦如此言宰相呂夷  
簡樞密副使蔡齊相繼論諫兼侍御史知雜事楊偕同

知諫院郭勸復上疏卒罷陳氏或曰陳氏父號陳子城者始因楊太后納女宮中太后嘗許以為后矣至掖庭將進御勾當御藥院閹士良聞之遽見上上方披百葉圖擇日士良曰臣聞陛下欲納陳氏女為后信否上曰然士良曰陛下知子城使何官上曰不知也士良曰子城使大臣家奴僕官名也陛下若納奴僕之女為后豈不媿公卿大夫耶上遽命出之士良文應子也

此據司馬光記

間

甲辰詔立皇后曹氏贈尚書令冀王彬之孫女也郭后  
廢始聘后入宮

乙巳命宰相李迪為冊禮使參知政事王隨副之宋綬  
撰冊文并書冊寶有司奏用冬至日行冊禮監察御史  
裏行會稽孫沔言章獻三年之喪未除請終制而後行

祕書丞曲江余靖亦為言不報

王巖叟元祐繫年錄云  
呂相白太后曰亦聞仁

皇罷陳子城親事否太母曰仁皇聖明御藥間安說得  
子細其父士良當時正親近一日仁皇曰你何不賀我  
士良曰賀甚事曰賀我尋得皇后士良曰誰家曰陳子  
城家士良曰子城官職乃奴隸也富民用錢買到仁皇

遜曰幾乎錯了明日以語呂夷簡夷簡賀聖明人言呂夷簡先言非也却是仁皇說與聖明如此余曰願陛下體此意呂相亦云然太母又問曰當時因甚去明肅服內納后大臣怎肯神宗曾問不知何故如此便及臣庶家也不肯呂相等皆不知所對樞密先下余語師朴曰適來事先令公嘗說及今上再欲奏既復對師朴奏適來聖問明肅服內納后事先臣却曾說與王巖叟余曰臣嘗聞韓琦說此事當呂夷簡作宰相范仲淹作諫官仲淹語琦曰呂相又勸上做一件不是當底事也須共理會仲淹往見夷簡面責夷簡曰固知非禮司諫却不知裏面事上春秋盛妃嬪已雜進不早立后無以制非所以愛上仲淹無以折復見韓琦曰呂相幸自不是被他有說後沒可奈何太母笑曰元來却是恁地師朴又曰應是恐妃嬪中進起來作后太母曰那門識甚君臣識甚事體余曰須立后則事體自然正按立曹后時范仲淹已責在睦州詰呂夷簡者必非仲淹也巖叟誤記

賜西京嵩山草澤李退夫清逸處士退夫居嵩山辟穀守道本京上聞故賜之後以事追奪

丁未樞密副使李諮言天聖初行新定茶法而議者沮毀之吏人王舉等皆坐黥配今三司言歲課益虧請復用天聖初定法舉等顯為非辜乞與優叙之詔舉等先依三司出職例各遷一資諮頃在三司陝西緣邊數言軍食不給度支都內錢不足支月俸太后憂之命輔臣與諮經度其事諮以謂舊法商人入粟邊郡算茶與犀

象緡錢為虛實三估至用十四錢易官錢百坐困三司  
乃請變法以實錢入粟實錢售茶二者不得相為輕重  
既行而商人果失利怨謗蜂起諮尋以病請外相繼坐  
變法譴絀踰六年乃再入三司遂登西府時三司說法蠹  
耗日甚議者皆言諮前枉被譴絀將復用見錢法故諮  
先有是請

戊申詔入內侍省以所估尚氏等值金帛二十餘萬  
貫賜三司給軍費

壬子詔名皇太后所居殿曰保慶宮自今並以保慶皇太后為稱

癸丑除宿州無戶食鹽錢

冬十月庚申罷淮南江浙荆湖制置發運使仍詔淮南轉運使兼領發運使司事其制置茶鹽礬稅各歸逐路

轉運司

此必有獻議者當考蔣堂亦其一人也見明年十月

辛酉詔虔州留上供米三萬斛減價出糶以賑貧民

改崇信節度使贈侍中錢惟演謚曰思先是太常博士

祕閣校理同知禮院張瓌議曰惟演歷清華升宥密博  
學業文此其所優也自母后助治逮主上躬政而附援  
求益迎合輕議為執法所糾左降偏郡夫位兼將相不  
為不達矣任易中外不為不用矣宜引滿覆之誠而貪  
慕權要嚮生不足此其所劣也前史稱沈約昧於榮利  
有志台司元稹大為賂遺經營相位惟演之謂矣謚法  
敏而好學曰文貪而敗官曰墨請謚文墨其家訴於朝  
詔判太常禮院章得象等覆議以惟演無貪黷狀而晚



節率職自新有惶懼可憐之意取謚法追悔前過改謚  
曰思詔可仍詔自今定謚頒禮院集官衆議之

初大名府言自河決橫壠而德博以來皆罹水患請早  
行修塞即詔王泐等相視泐等以為河勢奔注未定且  
功大未可遽興癸亥復遣侍御史知雜事楊偕入內押  
班王惟忠閤門祇候康德輿同往視度既而偕等言欲  
且興築兩岸馬頭令緣堤預積芻藁俟來年秋乃大發  
丁夫修塞從之 新廣東轉運使龐籍言昨為御史奏

彈吳守則范諷交通尚繼斌事諷既出守兗州乃給言  
家貧假翰林銀器數千兩自隨而增產於齊州市官田  
虧平估請併行按劾詔諷以所假銀器還官

乙丑詔閣門祇候自今須尚書員外郎諸司使以上及  
本路轉運使或提點刑獄一員共七人舉之方許引對  
丁卯詔中書提點五房公事及堂後官自今以八員為  
定制仍參擇選人為之 趙元昊自襲封即為反計多  
招納亡命峻誅殺以兵法部勒諸羌始衣白窄衫羶冠

紅裏項冠後垂紅結綬自號威明烏珠凡六日九日則見官屬其偽官分文武或靴笏幞頭或冠金帖鏤冠緋衣金塗銀束帶佩蹀躞穿靴或金帖紙冠間起雲銀帖紙冠餘皆禿髮耳重環紫旋襴六垂束帶佩解結錐短刀弓矢韞乘鯢皮鞍垂紅纓打跨鉞拂民庶衣青綠用此以別貴賤元昊初制禿髮令先自禿髮及令國人皆禿髮三日不從令許衆殺之每欲舉兵必率酋豪與獵有獲則下馬環坐飲割鮮而食各問所見擇取其長

是歲春始寇西邊殺掠居人下詔約束之居國中益僭  
竊私改元曰開運既逾月人告以石晉敗亡年號也乃  
更廣運默穆氏族人尚實謀殺元昊事覺元昊酖其母  
殺之沈尚實之族於河遣使來告哀詔起復鎮軍大將  
軍左金吾衛上將軍員外置同正員以內殿崇班閤門  
祇候王中庸為致祭使兵部員外郎兼起居舍人郭勸  
為弔贈兼起復官告使元昊賂遺勸等百萬勸悉拒不  
受既而元昊復立額藏渠懷氏為威尼威尼者太后也

己巳頒諸州軍土牛經前詔日官取舊文冊校重複為四篇知制誥丁度撰序刊印其牛色及策人衣並以歲日支干納音相配云

癸酉以淨妃玉京冲妙僊師清悟為金庭教主冲靜元師美人楊氏聽入道賜名宗妙並居安和院仍改賜院名曰瑤華宮 詔天下獄有重繫獄官不得輒預游宴送迎

乙亥詔諸路募民掘蝗子一升給二十錢

丁丑命有司還先所籍沒周懷政家財產

辛巳賜舒州學田五頃

壬午命龍圖待制燕肅集賢校理李照直史館宋祁同  
按試王朴律準肅時判太常寺建言舊太常鐘磬皆設  
色每三歲親祠則重飾之歲既久所塗積厚聲益不協  
故有是命帝親閱視律準題其背以屬太常肅等即取  
鐘磬剗滌考擊用律準按試其聲皆合

癸未戶部員外郎兼侍御史知雜事楊偕為契丹生辰

使謝絳以父疾辭也

甲申以選納皇后賜在京諸軍班特支

乙酉詔太常禮院祭皇地祇神州地祇舊皆常參官攝事非所以尊神也自今命大兩省以上官奉祀之

丙戌慶州緣邊都巡檢使西頭供奉官閤門祇候楊遵寧州都監左侍禁閤門祇候王文並落職走馬承受右侍禁趙德宣桑遠寨監押右侍禁盧訓並降左班殿直為諸州監押又降環慶路副都部署馬軍都虞候端州

防禦使張守遵汀州防禦使陝州部署落官軍環慶路  
鈐轄西作坊使李惟熙為西染院使知隰州前環慶都  
監內殿承制閤門祇候齊宗矩奪兩官廬州編管治龍  
馬嶺及節義烽敗兵之罪也守遵惟熙坐不能料敵故  
并責之

張守遵  
李惟熙

權度支判官李申言廣南蕃舶多毀

錢以鑄銅器請自今陳告者皆倍給賞錢公人遷一資  
從之

十一月己丑冊皇后



乙未進封乳母高陽郡夫人為崇國夫人

甲辰徙涇原路部署兼知渭州解州團練使張敏知冀州轉運使言敏為治無善狀惜隨軍錢不以犒士故徙之詔京舊城內侵街民舍在表柱外者皆毀撤之遣入內押班岑守素與開封府一員專其事權知開封府王博文之請也增置泰州通判一員

戊申贈皇后二代祖彬進封魯王父玘為太傅兼侍中己酉詔親祠郊廟乃用御所制樂章其有司攝事樂章

令宰臣呂夷簡李迪分撰之

御所制樂章  
其明年六月

除滁州舒

城縣贍軍茶歲七千三百五十斤蓋沿江南偽主時課  
民所輸范仲淹使淮南請除之

庚戌封皇后祖母唐氏為延安郡太夫人

辛亥詔太常寺自今享先農釋奠文宣王武成王並用  
登歌樂令學士院撰樂章 詔西京留守司與河南府  
事如藩鎮節度觀察兩使例通領之 南平王李德政

遣靜海節度判官陳應機掌書記王惟慶來獻方物馴

象二詔以應機為太子中允惟慶為大理寺丞並賜三品服 東上閤門使榮州刺史曹琮為衛州團練使琮女兄為后禮皆琮主辦於是奏曰陛下方以至公厲天下臣既備后族不宜冒恩澤亂朝廷法族人敢因緣請托願寘於理時論稱之尋出為環慶路部署知邠州十二月己未步軍都虞候康州防禦使涇原路副都部署曹儀為耀州觀察使落管軍皇后既立儀自乞罷軍職從之

丁卯幸開寶寺上清宮祥源會靈觀祈雪

屯田員外郎張亢者奎弟也豪邁有奇節嘗通判鎮戎軍上言趙德明死其子元昊喜誅殺勢必難制宜亟防邊論西北攻守之計章十上上欲用之會丁母憂或傳契丹聚兵幽涿間河北皆警癸酉命亢為如京使知安肅軍因入對曰敵歲享金帛甚厚今其主孱而歲歉懼中國見伐特張言耳非其實也萬有一倍約臣請擇甲為諸軍先

知安肅軍據本傳實錄無此當考或恐此時但換官未知安肅軍也然四年十二月亢知

安肅軍移知瀛州則知  
安肅軍亦必在此時也

朝廷欲大發軍為邊備輔臣

迭議上前參知政事蔡齊畫三策料契丹必不渝盟已  
而果契丹祭天幽州以兵屯境上爾

已已知制誥李淑言幕職州縣官舉充京朝官者別差  
官與判銓官同試判望自今更不逐次奏請差官只委  
自判銓官考定優劣如詞翰稍優或刑名全否者即令  
貼黃進呈詔吏部銓詳定以聞後請如淑議從之

癸酉雪賜近臣宴於中書 趙元昊獻馬五十匹以求

佛經一藏詔特賜之

實錄於此既書賜經明年十二月又書獻馬求經特賜之當是一事

誤重出爾今止見於此

丁丑陞鄭州為節鎮賜軍額曰奉寧以大兩省官知州

省解州鹽池都巡檢內臣一員

戊寅幸開寶寺上清宮祥源會靈觀謝雪

已卯宣慶使忠州防禦使入內都知藍繼宗為景福殿使邕州觀察使罷都知以老疾自請也繼宗事四朝謙謹自持每領職未久輒請罷家有園池退朝即亟歸同

列或留之繼宗曰我欲歸種花弄遊魚為樂耳景福殿  
置使自大中祥符五年至今授者才三人劉承珪韓守  
英及繼宗也

辛巳契丹遣左千牛衛上將軍耶律師古東上閣門使  
劉五常來賀正旦

癸未以天雄軍部署萊州團練使邵復為都大修河部  
署供備庫副使王遇為澶州部署右侍禁閣門祇候王  
昭序為滄州部署並兼修河事 三門白波發運使文

洎言諸埽須薪芻竹索歲給有常數費以鉅萬計積久多致腐爛乞委官檢覈實數仍視諸埽緊慢移撥并斫近岸榆柳添給免采買搬載之勞因陳五利詔三司詳所奏遂施行之洎介休人也

此據本志附見仍取會要增修會要乃十月事也

監察御史裏行孫沔言臣聞主聖臣忠朝有直言之士下情上達外揚進善之旌前王思廣於聰明庶政莫能於壅塞尚慮諫臣顧祿竊位懷安故於觀闕之前專設匭函之制言之無罪誠不間於卑微來者可追庶獲



聞於讜議時加激賞猶避深譏或致嚴科實為止善今  
竊見上封事人同安縣尉李安世輒因狂悖妄進瞽言  
不識朝廷之儀惟振市井之事毀欺日月干犯雷霆死  
有餘辜身不容責兼聞下吏審問支辭致詰飛聲推窮  
敗類然極索姦之理或傷招諫之仁雖曰狂愚猶勝諂  
佞况自道輔仲淹被黜之後龐籍范諷置對已來凡在  
縉紳盡思緘默又慮千里之外四方之人不知安世訕  
上犯顏將謂安世獻忠獲罪豈有至聖猶忌危言自遠

流傳為議非美覆巢之卵其類惡傷彈雀以珠所惜者  
大伏望俯迴造化貸以寬恩特免竄投以勵全節使彼  
偷安之士永懷內愧之心況臣與其人素匪交親未嘗

識面縱干大典絕不相因惟恐史官直書於簡牘可嗟

言路重誤於難危伏乞少霽天威用存國體後七日

景祐

二年正月六日

責知潭州衡山縣

汚集自注此疏以十二月二十九日上正月初六日責衡

山汚未知有責命復上書曰

汚集自注云正月三日上書七日復責

陛下

基紹寶圖務敦淵靜韜暖英謀竭伸孝愛而內閣輔政

朝制弗經宦寺弄權海宇側目女謁交馳大通行賂陛下  
下山藏無違日覆不照洎章獻上僂萬機獨斷躬親大  
政勵精為理投羣閹之巨黨罷內降之私恩陞擢諫臣  
黜退竊位每旦聽政舊邦惟新庭宇載清幅員忻戴將  
以執之若金石行之若軌軌希陶唐之風襲文景之跡  
為一代之宏規冠千篇之良史豈不大哉比及周歲頗  
異曩時內寵豔興中宮傾易楊尚恃恩權勢特盛事由  
請行言自詖出君子小人腹誹竊議幸賴陛下神明義

斷廢黜外官雖合正家之道未遑刑國之宜功業弗彰  
簡編安在累歲已來和氣猶鬱水旱相薦蟲螟屢生粟  
麥不登田疇幾廢九夏多寒三冬無雪星變上天河決  
東郡疾疫流離生靈困憊民乏兼日之食廩無卒歲之  
儲既底而富曷其若是正當不足之時豈曰無為之化  
陛下不可謂時無兵革乃號太平政奉簡書便為端拱  
竊恐禍生所忽亡有其存漸至陵夷將無逸豫有唐天  
寶可謂覆車前春伏見詔書布下每旦親政故天下之

民謂吾君憂勤率仁之化翹足可待去秋以聖體愆和  
臣心啟沃愛君有從宜之制雙日伸不坐之請交泰之  
誠遽臻有喜宴安之戒豈可為常且一月之中適減其  
半慶辰嘉節休沐受釐三分之日復廢其一是則一歲  
之中率無百餘日視事宰臣上殿奏事止於數刻天下  
萬務得不曠哉漢帝五日一朝則有伏蒲入閣據廁與  
語唐制三日一坐則有便殿更番浴堂延對今退朝之  
後深宮之中侍左右者刀鋸虧殘之餘悅耳目者綺紈

艷冶之色局鑰九重叫闥千仞宸禁森嚴乘輿大遠固  
未見歟名臣請問外事詢祖宗之紀綱質朝廷之得  
失徒修簡易之名未益承平之化臣恐其未可也況今  
之政失於寬而蔽於姑息今之士弛於務而幸於因循  
是養其惰也夫天下之本在民民之豪者皆兼井而貧  
者無置錙天下之大在兵兵之下者負饑寒而驕者不  
敢役郡守縣令臧否無別冗食萬千蠹耗靡窮邪佞退  
而復興忠諫黜而未用此害之大者也設欲止之於未

發救之於將然莫若振綱舉目杜漸防微勤儉為先剛  
斷為急權之一去安可再得豈宜崇尚寬大自從清宴  
若謂怡神養性之方且非耄期倦勤之際臣復以為不  
然也今陛下春秋鼎盛氣志如神釋習常之蔽加致知  
之心觀禹湯克己之規敷文武勤教之旨振三祖之基  
為百世之法則垂鴻自我豈不盛歟願因歲首正朝之  
始霈然下令誕告多方每旦恭已辨色居位推擇大臣  
講求古道降以溫顏俾之極論精思品藻督責賢否外

則逐刺史縣令無狀老懦貪殘之輩以利於民內則罷公卿大夫不才諂佞詭誕之士以肅於朝掖廷之中簡去幽曠以求錫羨之慶宦寺之內抑損重任以防昵近之私發號施令必審其有害賞功罰罪必思其未平則可使教敦于上民悅於下足以招天地之協氣致國家之豐隆皆目前可見之事惟陛下力行而已書奏再責

監永州酒

正月七日責監酒今並書於此實錄殊不載  
汚再責事可謂疎畧此據汚家集及單仲游

神道碑



是歲天下上戶部主戶六百六萬七千五百八十三口  
二千一十二萬三千八百一十四客戶四百二十二萬  
八千九百八十二口六百八萬一千六百二十七